



**O PRESIDENTE
DA
DEPUTACIÓN PROVINCIAL DA CORUÑA**

DISCURSO DE INVESTIDURA DO PRESIDENTE DA DEPUTACIÓN DA CORUÑA, VALENTÍN GONZÁLEZ FORMOSO

A Coruña, 1 de xullo de 2019

Señor delegado do Goberno en Galicia,

Alcaldesas e alcaldes da provincia da Coruña,

Excelentísimas e ilustrísimas autoridades

Señoras e señores deputados,

Amigos e amigas,

Desde o recoñecemento a unha institución bicentenaria, das mais antigas do Estado; testigo privilexiada dos avatares da nosa historia, que leva prestado e segue a prestar un servizo esencial como soporte das entidades locais, e a desempeñar un papel fundamental na arquitectura administrativa do Estado, creo necesario, dende a mais profunda convicción persoal, reflexionar sobre o reto apaiñoante e o avance democrático que podería supor a elección directa pola cidadanía dos seus representantes nas Corporacións Provinciais, como fórmula que lexitime as estruturas políticas supramunicipais emanando directamente da soberanía popular.

Mentres, compartimos un proxecto, asentado na súa historia, e que lonxe de simplemente existir, aporta, constrúe, fai palpar o mellor da Coruña. Unha provincia reforzada por esa unión que entre todos fixemos posible e que hoxe nos permite afrontar o futuro coa confianza dunha sociedade moderna e puxante, que investiga e crea, que traballa e constrúe, que soña e que avanza cara adiante.

Catro anos despois, inicio esta nova etapa con ilusión, optimismo e cun agradecemento infinito á sociedade coruñesa pola inmensa confianza depositada en nós nas pasadas eleccións municipais para seguir gobernando, transformado e modernizando esta provincia.

Se mo permiten, quero dar as grazas en primeiro lugar á miña familia, polo apoio constante e incondicional durante todos estes anos, a pesar das incontables horas que a miña dedicación como alcalde e presidente lles sustrae.



**O PRESIDENTE
DA
DEPUTACIÓN PROVINCIAL DA CORUÑA**

O meu agradecemento sincero e profundo tamén aos deputados e deputadas desta nova corporación que vimos de constituír, con cinco forzas políticas representadas neste hemiciclo.

Unha corporación que é de novo plural e diversa, con diferentes ideas e sensibilidades, o que requirirá de nós diálogo, entendemento e altura de miras para continuar avanzando.

Grazas en especial ás miñas compañeiras e compañeiros do PSOE. Unha formación política con 140 anos de historia que trouxo a este país as maiores cuotas de progreso, igualdade e avances sociais.

Unha senda que humildemente trataremos de seguir dende esta Deputación sabendo que o progreso non é irreversible, que o que tarda anos en construírse pode tirarse abaixo en apenas un instante.

Conscientes de que os logros que conseguimos xuntos deben ser defendidos todos os días.

Grazas, señoras e señores deputados, por confiar de novo maioritariamente en min para para presidir o goberno provincial.

É unha honra e un orgullo.

Ilusión, orgullo e agradecemento son os meus sentimentos neste momento, pero sobre todos eles pesa o sentimento da responsabilidade...

A inmensa responsabilidade de seguir gobernando unha provincia que é o motor social, cultural e económico de Galicia.

Unha provincia que é a quinta potencia económica de España e unha institución que é bandeira e referencia, non só en Galicia, senón en todo o Estado, de cómo deben ser as deputacións no século XXI.

Son consciente de que isto non é froito do traballo dun só goberno, senón da labor constante realizada durante catro décadas polos diferentes gobernos e presidentes que me precederon nesta tribuna e que situaron á Deputación da Coruña á vangarda das deputacións do país.

É tarefa e responsabilidade da nosa xeración manter vivo e mellorado no posible, ese legado.



**O PRESIDENTE
DA
DEPUTACIÓN PROVINCIAL DA CORUÑA**

Comprométome a seguir presidindo esta institución cos valores que a miña vila e miña familia me ensinaron: humildade, traballo, orgullo das miñas orixes e vocación de servizo público.

Seguirán atopando en min a un presidente co seu despacho sempre aberto, con disposición permanente ao diálogo e o consenso, como sempre temos feito nesta Deputación.

Comprométome a liderar un goberno provincial que terá como principio fundamental a lealdade institucional, a colaboración con todas as administracións, independentemente da súa cor política; e como único norte a defensa dos intereses xerais da cidadanía desta provincia.

Un goberno provincial que pense nas próximas xeracións, non nas próximas eleccións; que teña os pés ben asentados na terra, pero a mirada no horizonte.

Señoras e señores deputados,

Presidir a Deputación da Coruña nos últimos catro anos deume a oportunidade de coñecer mellor esta provincia e valorar o seu enorme potencial.

Pisar o territorio, percorrer cada un dos 93 municipios, ver cómo os investimentos que aprobamos neste salón de sesións pasan de ser números, informes e proxectos técnicos plasmados nun papel a converterse en estradas, centros sociais ou escolas infantís; en persoal de axuda no fogar ou de teleasistencia para os nosos maiores; en emprego para a nosa mocidade... supón non só unha enorme satisfacción, senón un estímulo para continuar traballando e mellorando cada día.

Este contacto permanente cos concellos aos que nos debemos supón tamén unha fonte inesgotable de novas ideas, proxectos e iniciativas.

Por iso continuarei percorrendo os concellos da nosa provincia, pisando as estradas e os camiños, escoitando aos alcaldes e alcaldesas e aos seus veciños, e supervisando persoalmente as obras e os servizos que esta Deputación impulsa en todos e cada un dos concellos coruñeses, desde as grandes cidades ás aldeas máis pequenas.

Servizos e infraestruturas que chegan ata o último recuncho do noso territorio e axudan a mellorar a vida das persoas.



**O PRESIDENTE
DA
DEPUTACIÓN PROVINCIAL DA CORUÑA**

Que contribúen a que un veciño de Moche, de Frades ou de Irixoa poda ter as mesmas oportunidades que alguén que resida na Coruña, Santiago ou Ferrol á hora de atopar traballo, dar estudos aos seus fillos ou fundar unha familia.

Boa parte deses investimentos débense á posta en marcha no anterior mandato de programas coma o Plan Único, o maior plan de cooperación das catro deputacións galegas e un dos maiores de España.

En apenas tres anos, supuxo un investimento de 283 millóns de euros nos 93 concellos desta provincia, unha cifra nunca antes alcanzada na historia desta Deputación.

O Plan Único supuxo na xestión desta Deputación máis protagonismo e autonomía municipal para os nosos concellos e unha importantísima mellora da situación económica dos municipios coruñeses.

Pero máis alá dos números, o Plan Único activou un novo modelo de colaboración entre a Deputación e os concellos coruñeses que nos volveu a situar na vangarda estatal, abrindo un camiño cara o futuro que hoxe están a seguir moitas outras deputacións de España.

Nestes catro anos escoitaremos falar de moitos "plans únicos" en moitas deputacións do Estado.

Como pioneiros neste camiño, correspóndenos seguir desenvolvendo, innovando e mellorando este potente instrumento que articula a colaboración municipal, a principal razón de ser desta institución.

Señoras e señores deputados,

No mandato que hoxe comeza, a loita contra o despoboamento do rural coruñés será un dos obxectivos transversais e prioritarios do meu Goberno.

A fenda demográfica entre o medio rural e o urbano volveu agrandarse nos últimos anos na nosa provincia, ao igual que no resto do país.



**O PRESIDENTE
DA
DEPUTACIÓN PROVINCIAL DA CORUÑA**

Segundo o estudo “Poboación e Despoboación en España”, elaborado pola Federación Española de Municipios e Provincias, na metade da superficie de Galicia apenas vive o 6% da poboación, mentres que nas cidades se concentra o 36 %.

Este proceso de regresión demográfica e baleiramento do rural é a día de hoxe un problema de Estado e un dos principais retos que debemos afrontar coa implicación e coordinación de todas as administracións públicas nunha fronte común... Unha gran alianza contra esa nada que avanza imparabile e ameaza con levarse as nosas raíces e a nosa forma de vida, convertendo ao rural galego nun deserto nas vindeiras décadas.

A revitalización do mundo rural é urxente e inaprazable, pois dela vai depender a sustentabilidade demográfica, socioeconómica e cultural da provincia da Coruña e de Galicia.

O capital humano é o máis importante para un territorio, o motor do desenvolvemento social e económico.

Por iso, quero anunciarlles que na Deputación da Coruña impulsaremos a creación dunha Axenda Rural Provincial, que terá como obxectivos xerais apoiar a mellora do nivel de vida, a creación de emprego e a fixación de poboación no rural coruñés.

Como saben, son miles as accións que esta Deputación realiza cada ano para impulsar o desenvolvemento económico, social e cultural dos pequenos concellos.

A Axenda Rural Provincial servirá como eixo planificador e vertebrador de todas estas accións, axudándonos ademáis a preparar á provincia para unha intervención activa no periodo de programación de fondos europeos a partir de 2020.

Neste sentido, quero anunciarlles hoxe un primeiro paso.

A Deputación da Coruña vén de obter do Goberno de España preto de 1 millón de euros de financiamento para dous novos programas de loita contra a “España vaciada” e a fixación de poboación no rural.

Eses fondos destinaranse á creación de dúas novas liñas dentro do Plan de Emprego Local desta Deputación: PEL- RURINNOVA e PEL-RELEVO, que terán como obxectivo fomentar a innovación e o emprendemento e garantir o relevo xeneracional nas pequenas empresas do rural.



**O PRESIDENTE
DA**

DEPUTACIÓN PROVINCIAL DA CORUÑA

Nas vindeiras semanas presentaremos en detalle estes programas que temos previsto aprobar no primeiro pleno ordinario deste novo mandato, simbolizando así o compromiso deste Goberno neste eido.

...

Falando de emprego, hoxe quero enviar tamén unha mensaxe aos 53.400 coruñeses e coruñesas que, segundo a Enquisa de Poboación Activa, continúan vivindo cada día o drama do desemprego.

Quero dicirlles que van a seguir sendo a principal preocupación e a principal ocupación desta Deputación.

No anterior mandato, puxemos en marcha o PEL, o primeiro Plan de Emprego da historia desta institución.

As políticas de emprego pasaron de ser unha simple liña de apoio económico aos concellos para a contratación temporal de cuadrillas de obras a converterse nun dos sinais de identidade da Deputación da Coruña.

Un ambicioso programa plurianual dotado con 30 millóns de euros, con diferentes liñas de acción nos sectores público e privado, que a día de hoxe permitiu a 3.000 persoas atopar un emprego e que apoia cada ano a centos de emprendedores e emprendedoras na posta en marcha das súa ideas de negocio.

Sí. Estamos satisfeitos cos resultados, pero aínda queda moito por facer.

Por iso, o PEL vai seguir crescendo e desenvolvéndose neste mandato, coa creación de novas liñas de acción específicas, coma os citados programas de creación de emprego no rural e a posta en marcha da nova Rede Provincial de Espazos de Coworking.

Unha Rede que xa plantou a súa primeira semente no centro piloto do Pazo de Arenaza (Oleiros), onde 16 emprendedores – oito homes e oito mulleres- traballan dende maio en proxectos empresariais innovadores.

Pronto entrarán en funcionamento tamén centros similares en Brión, Ames, Carballo e Boiro, que completarán unha rede destinada a potenciar e aproveitar o talento emprendedor da nosa xente moza, para que podan traballar e atopar na nosa terra as oportunidades que as anteriores xeracións non tiveron.



**O PRESIDENTE
DA
DEPUTACIÓN PROVINCIAL DA CORUÑA**

No ámbito económico, a Deputación seguirá liderando e apoiando firmemente os proxectos que sexan de interese estratéxico para a nosa provincia:

- Apoiando a necesidade urxente de reactivar o sector industrial.
- Impulsando a modernización do noso mar e o noso agro, participando e acompañando a incorporación de emprendedores a ese mundo.
- Promovendo a creación dunha zona franca que apuntale o liderado exportador da Coruña e contribúa ao desenvolvemento integral do territorio provincial e galego.
- E favorecendo a transferencia de coñecemento, talento e innovación entre as dúas universidades (A Coruña e Santiago) e o noso tecido empresarial e emprendedor, para reforzalo e adaptalo ás necesidades do século XXI.

Señoras e señores deputados,

Como acabo de relatar, a revitalización do rural coruñés, a potenciación da cooperación cos municipios e a aposta polo emprego serán tres eixos vertebradores e transversais, tres obxectivos irrenunciabes da acción do goberno provincial neste mandato.

Pero esta Deputación ten por diante outros retos importantes en áreas que sinalarei brevemente:

Continuaremos coa nosa aposta por unha provincia verde e pola mobilidade sustentable.

No pasado mandato puxemos en marcha iniciativas coma o Plan de Medioambiente, impulsamos a actividade da Axencia Enerxética Provincial e creamos novas liñas de apoio ás entidades que contribuíron a mellorar a calidade ambiental da nosa provincia.



**O PRESIDENTE
DA
DEPUTACIÓN PROVINCIAL DA CORUÑA**

Seguiremos traballando nese sentido e deseñando novas medidas.

Neste eido, é para min unha satisfacción poder anunciarlles hoxe que nos últimos días recibimos confirmación oficial da concesión de 4 millóns de euros de fondos FEDER, que esta Deputación solicitou para acometer ambiciosos proxectos que contribuirán a potenciar o turismo e a mobilidade sustentable no noso territorio, entre eles:

- As Sendas dos Faros que conectarán 11 faros de Ferrolterra, Ortegal, Costa da Morte e Barbanza cos seus núcleos de poboación.
- E a primeira Vía Verde da provincia da Coruña, que permitirá percorrer a pé ou en bicicleta os 37 quilómetros que separan Santiago e Cerceda nun itinerario singular construído sobre as antigas vías do ferrocarril.

No ámbito do Servizos Sociais, non podo deixar de ter hoxe un sentido recordo para Ánxela Franco, deputada responsable desta área durante o pasado mandato, falecida prematuramente o pasado mes de xuño.

Sei que os numerosos colectivos e entidades sociais desta provincia apreciaban moito o seu labor diario, o seu compromiso e súa cercanía; unha senda que imos continuar nestes catro anos.

Son consciente de que esta área e é “o corazón” desta institución, por iso seguiremos blindando o investimento social nos orzamentos anuais da Deputación e incrementando programas coma o dos servizos sociais sociomunitarios, que permite que ata o concello máis pequeno poda contar con algo tan imprescindible coma un servizo de axuda no fogar.

Tamén continuaremos mellorando o servizo de Teleasistencia, ese “botonciño da Deputación”, como o chaman os usuarios, que acompaña 24 horas a 2.000 maiores da nosa provincia e que lles proporciona a eles e ás súas familias a tranquilidade de saber que sempre hai unha voz amiga ao outro lado da liña.

Durante este mandato, incrementaremos a 3.000 o número de persoas que usuarias do servizo.



**O PRESIDENTE
DA
DEPUTACIÓN PROVINCIAL DA CORUÑA**

Seguiremos traballando tamén para ampliar e mellorar a seguridade dos 2.100 quilómetros da Rede Provincial de Estradas.

No pasado mandato investimos máis de 80 millóns de euros para facer estradas máis seguras e para construír 60 novos quilómetros de sendas peonís.

Neste mandato manteremos o ritmo inversor e iniciaremos un proceso de ordenación da rede de estradas, en coordinación coa Xunta de Galicia e os concellos da provincia, para a transferencia dos primeiros viais á administración autonómica e aos concellos.

A cultura, o turismo, a igualdade, a implantación da administración electrónica e a mellora dos servizos públicos, así como o soporte xurídico, económico e técnico aos municipios con menos recursos seguirán sendo tamén prioridades para este Goberno provincial.

Señoras e señores deputados,

Remato xa...

Comeza hoxe un mandato que, como dixen ao principio, desexo que se caracterice pola colaboración e o consenso.

Espero seguir contando tamén coa inestimable axuda dos traballadores e traballadoras desta casa.

Sei que sodes un equipo humano experimentado, cualificado e eficaz e volvo a pedirvos a vosa colaboración para continuar traballando xuntos por unha Deputación mellor.

Unha Deputación e unha provincia da que todas e todos nos sintamos orgullosos.

Orgullosos da nosa identidade coruñesa, da historia común que nos trouxo ata aquí, dos lazos que nos unen con Europa e con América, onde a emigración mantivo viva a chama da galeguidade nos tempos máis escuros.

Orgullosos da nosa cultura, da terra que veu nacer a Rosalía e Castelao, a Pondal e a Dieste, a Torrente Ballester e a Camilo José Cela. Sen as súas páxinas non se podería concebir a Galicia actual.



**O PRESIDENTE
DA
DEPUTACIÓN PROVINCIAL DA CORUÑA**

Da provincia da Coruña que iluminou a creatividade xenial de Luis Seoane e Díaz Pardo, que inspirou os primeiros bocetos do neno Picasso e a madurez artística de Granell, que deu forma ao soño modernista dos Irmáns García Naveira, que namorou a Lorca, García Márquez, John Berger e Julio Cortázar.

Desa Coruña das conquistas sociais, da igualdade e o feminismo que sementaron co seu exemplo mulleres coma Concepción Arenal, Marcela e Elisa ou Emilia Pardo Bazán.

A terra dos mil camiños, a *Finisterrae* da vella Europa.

Convócovos a continuar construíndo A Coruña das xeracións que nos continuarán.

A traballar sen un minuto de descanso, porque a meta ben o merece: un futuro mellor para a cidadanía e para os concellos desta provincia.

Co empuxe de todos e todas, coa ilusión do primeiro día.

Moitas grazas.